

Samþykkt fyrir öldungaráð Ísafjarðarbæjar

1. gr.

Umboð

Öldungaráð starfar í umboði bæjarstjórnar með þeim hætti sem nánar er kveðið á um í samþykkt þessari, samþykkt um stjórn Ísafjarðarbæjar og fundarsköp bæjarstjórnar og eftir því sem lög mæla fyrir um.

2. gr.

Verksvið

Öldungaráð skal vera bæjarstjórn, nefndum og ráðum Ísafjarðarbæjar til ráðgjafar um málefni og hagsmuni bæjarbúa sem eru 60 ára og eldri. Ráðið skal stuðla að hvers konar upplýsingagjöf og samstarfi við Ísafjarðarbæ, móta stefnu og gera tillögur til bæjarstjórnar sem varðar verksvið þess.

3. gr.

Hlutverk

Öldungaráð er vettvangur samráðs bæjarbúa sem eru 60 ára og eldri, félagasamtaka þeirra, atvinnulífs og bæjaryfirvalda og er virkur þátttakandi í allri stefnumörkun um málefni eldri borgara. Öldungaráð er ráðgefandi fyrir starfsemi Ísafjarðarbæjar í málefnum eldri borgara og stuðlar að eflingu félagsauðs og kynningu á þjónustu stofnana bæjarins til bæjarbúa sem eru 60 ára og eldri.

4. gr.

Skipan

Öldungaráð er skipað 9 fulltrúum og jafnmörgum til vara.

- Tveir fulltrúar og tveir til vara tilnefndir af bæjarstjórn.
- Sex fulltrúar og sex til vara tilnefndir af Félagi eldri borgara í Ísafjarðarbæ.
- Einn fulltrúi og einn til vara tilnefndur af Félagi eldri borgara í Önundarfirði.

Öldungaráð kys sér formann og varaformann. Kjörtímabil ráðsins er hið sama og bæjarstjórnar.

Þá getur öldungaráð tekið ákvörðun um áheyrnarfulltrúa hagsmunasamtaka með málfrelsi og tillögurétt.

Öldungaráð getur í sérstökum tilfellum skipað undirnefndir til að fjalla um afmarkaða málaflokka. Ákvörðun um skipun undirnefndar skal tilkynna bæjarstjórn.

5. gr.

Verkstjórn og verkaskipting

Formaður ráðsins er í forsvari fyrir það um stefnumótun og ákvarðanir þess eftir því sem við á og hefur, ásamt öðrum fulltrúum í ráðinu, eftirlit með framkvæmd mótaðrar stefnu í málefnum eldri borgara.

6. gr.

Þjónusta Ísafjarðarbæjar við öldungaráð

Til að greiða fyrir starfsemi öldungaráðs beinir Ísafjarðarbær þeim tilmælum til stofnana bæjarins að þær veiti öldungaráði aðstöðu til fundahalds án endurgjalds. Velferðarnefnd ákveður ár hvert

fjárframlag til öldungaráðs sem ætlað er til að greiða t.d. pappír, póstburðargjöld, veitingar og fleira samanber hlutverk þess.

Velferðarsvið Ísafjarðarbæjar aðstoðar öldungaráð við upplýsingaöflun úr stjórnsýslunni og sér um skrifstofuhald fyrir ráðið.

7. gr.

Boðun funda og fundarsköp

Öldungaráð skal halda fund a.m.k. þrisvar á ári auk þess sem bæjarstjórn boðar öldungaráð til fundar, einu sinni á ári, þar sem öldungaráð getur komið sínum áherslum á framfæri.

Formaður öldungaráðs boðar til funda, ákveður dagskrá í samráði við sviðsstjóra velferðarsviðs og stýrir fundum ráðsins. Á dagskrá skulu m.a. tekin mál sem fulltrúar í ráðinu hafa óskað eftir að tekin verði þar fyrir enda séu þau á verksviði ráðsins. Fundir skulu boðaðir með a.m.k. viku fyrirvara og skal dagskrá fylgja fundarboði. Rafræn boðun fundar og útsending fundargagna telst fullgild boðun.

Heimilt er að taka mál til meðferðar í ráðinu þótt ekki sé það tilgreint á útsendri dagskrá en skylt er þá að fresta afgreiðslu þess til næsta fundar sé þess óskað.

Um fundarsköp fer eftir samþykkt um stjórn Ísafjarðarbæjar og fundarsköp bæjarstjórnar eftir því sem við á.

Sviðsstjóri velferðarsviðs skal sitja fundi öldungaráðs með málfrelsi og tillögurétt. Þá getur ráðið boðað til fundar einstaka starfsmenn Ísafjarðarbæjar sem og aðra þá sem hún telur þörf á hverju sinni.

8. gr.

Fundaskipulag og ritun fundargerða

Öldungaráð skal halda gerðabók og senda eftirrit fundargerða til bæjarstjórnar jafnóðum.

Fundargerðir öldungaráðs eru birtar á vef Ísafjarðarbæjar. Fundargerðirnar eru teknar til kynningar á fundum bæjarstjórnar og félagsmálanefndar.

Sviðsstjóri velferðarsviðs ber ábyrgð á fundarritun.

9. gr.

Málsmeðferð

Við undirbúning mála og stjórnvaldsákvæðanir skal þess gætt að farið sé að stjórnsýslulögum og verklagsreglum um stjórnsýsluna.

Um hæfi kjörinna fulltrúa og starfsmanna vísast í samþykkt um stjórn Ísafjarðarbæjar og fundarsköp bæjarstjórnar.

Samþykkt í bæjarstjórn 19. júní 2015